

# Sharmin Akhter Rupa – Luvrera en l'industria da textilias



Miu num ei Sharmin Akhter Rupa ed jeu hai 24 onns. Jeu sun carschida si en in vitg da Bangladesch ed hai astgau ir 5 onns a scola. Cu miu bab ha buca saviu luvrar pli, perquei ch'el ei vegnius malsauns, ha el stuiu empristar daners. Tuttina ha ei buca tunschiu da nutrir nossa famiglia cun otg del. Perquei ha mia sora veglia bandunau nies vitg Nipa per ir a Dhaka, el marcau principal da Bangladesch. Leu ha ella anflau lavur en ina fabrica da textilias. Paucs meins pli tard hai era jeu fatg il medem. Da gliez temps havevel jeu gest 14 onns. Mia sora ed jeu pagavan per la combra e dunsena quasi ton sco quei che nus gudignaven. El Bangladesch eis ei scumandau d'occupar affons en ina fabrica da textilias e perquei ha ei cuzzau pli ch'in meins, entochen che jeu hai anflau ina piazza sco forza auxiliara en ina fabrica. Cu il directur dalla fabrica, ni clients digl exteriur visitavan la fatschenta, stuevel jeu adina sezuppar. Secapescha ch'jeu gudignavel bia pli pauc che las cusunzas vid las maschinas. Perquei sun jeu sepresentada tier in'otra fabrica e vegnida engaschada sco cusunza vid la maschina. Leu hai jeu gudignau bia dapli. Igl ei iu mender cun miu bab e siu tractament ha custau adina dapli. Nus havein stuiu far gronds deivets. Entochen oz havein nus buca saviu pagar anavos quels. Deplorablamein ei gl'agid vegnius memia tard e miu bab ei morts ella vegliadetgna da 47 onns da cancer,

Per nossa famiglia essan mia sora ed jeu las sulettas che gudognan. Officialmein luvrein nus sis dis ad jamna dallas 8.00 entochen las 17.00 h cun ina pausa da miezdi dad in'ura. Savens fagein nus sururas ed ei capeta ch'jeu bandunel la fabrica per allas diesch dalla sera. Jeu level allas 5.00 h per saver preparar nies solver e gentar. Suenter la lavur mondel jeu a fiera per cumprar zatgei per tscheina. La lavur en fabrica ei dira. Jeu hai negin contract da lavur. Ca. 6000 personas lavuran en fabrica ed igl ei adina fetg dad ault e fetg cauld. Perquei survegn jeu meinsvart mal il tgau. Ruassar empau savein nus mo la dumengia.

Mo duas ga ad onn savein nus visitar nossa famiglia. Suenter haver tarmess 1/3 da nossa paga a nossa famiglia, cumprau il necessari che nus duvrein per viver e pagau nies tscheins-casa, resta ei mo pauc pli da nossa paga. Gia daditg mettein nus mintga rap d'ina vart per saver cumprar ina secunda maschina da cuser cul motiv da saver luvrar era a casa.

Cu miu frar ha terminau siu studi, vulesse jeu turnar anavos en miu vitg e cuser leu vestgadira per la populaziun dil vitg e pli tard saver fundar ina famiglia. Enqualga sun jeu fetg tresta, perquei ch'jeu hai buca saviu ir pli ditg a scola e daventar scolasta ni secretaria. En daquels muments sedamondel jeu sch'jeu hagi il dretg da semiar d'in meglier futur.

.....

*Julifkar Ali Manik ha rimnau las informaziuns. Manik ei schurnalist dalla gasetta "Daily Star" a Dhaka e lavura leu per la New York Times. El ha retschert il Sidney Award per sia reportascha dalla sbalunada dalla fabrica Plaza Rana, igl avrel 2013. Quei premi ei destinaus per schurnalistAs che retschercan sin palancau sozial ed economic. Quei ei in dils pli impurtonts premis sin palancau schurnalistic.*